



KOMUNIKADO PA PRENSA

Fecha

17 di yüni 2016

Accountmanager

Jhanirha Da Costa Gomez-Anita

Email

jhanirha.anita@gobiernu.cw

Tereno pa Tur, pero na òrdu si!

Kampaña di informashon tokante di okupashon ilegal di tereno.

Willemstad – Minister Camelia-Römer huntú ku Domeinbeheer a lansa un kampaña pa splika kon ta atendiendo seriamente ku okupashon ilegal di tereno di Gobièrnu. Lo usa vários medio di komunikashon pa duna siudadanonan tur informashon nesessario, ya asina nan por sa bon kon mester aktua den forma korekto ku tereno di Gobièrnu. “Tereno pa Tur, pero na òrdu si!”, ta e lema ku lo usa durante di e kampaña pa informá i motivá e públiko i duna splikashon tokante di e maneho di Sero Toleransia vigente.

E kampaña lo enserá aviso den korant, spòt di radio i televishon, facebook i infomercial. Tambe tin un wèpsait www.terenopatur.com kaminda por haña splikashon mas amplio di okupashon ilegal, mantenshon di òrdu, formalisashon i proyektonan di Domeinbeheer. Ademas komo un èkstra servisio na públiko a pone e number di telefòn 0800-1919 disponibel kaminda por yama pa mas informashon.

Okupashon ilegal ta algu sumamente serio, ku konsekuensia grave pa pueblo. Es ku okupá tereno di Gobièrnu den forma ilegal, ta perhudiká pueblo dor di kita propiedat for di pueblo i stroba un desaroyo planológiko adekuá ku ta na benefisio di pueblo.

P’esei mes Minister Camelia-Römer a hala un strepi i a introdusí e Maneho di Sero Toleransia pa stòp kasonan nobo. Lo evaluá kasonan di okupashon ilegal eksistente pa evaluá te kaminda ku por, si nan por bini na remarke pa keda formalisá, semper dentro di kuadro di lei, regulashon i maneho.

Mester establese den kada kaso si ta trata di un kaso eksistente òf di un kaso nobo. Ta hasi esei a base di potrètanan di satélite detayá ku a saka di tur sitio na Kòrsou, riba kua tur konstrukshon, kaya i tereno na Kòrsou ta registrá.

Lo atendé ku formalisashon di barío pa barío. Entrante ougùstùs, durante seshon di informashon, lo brinda oportunitat pa mèldu boluntariamente i hasi un petishon pa bini na remarke pa eventual formalisashon.

Minister Camelia-Römer huntú ku Domeinbeheer ta traha duru riba e trayekto di Rumbo pa Ekselensia pa mehorá su servisio i produktonan tambe, pa asina kumpli mihó ku nesessidat di pueblo. Den e kuadro aki tin vários proyekto ku ya a inisiá. Esun ku aktualmente mas ta resaltá ta konstrukshon di 134 kas sosial na Sapaté, Montaña ‘Bou, Tera Kòrá, Barber i Bonam, huntú ku Ministerio di Desaroyo Sosial, Labor i Bienestar i Fundashon Kas Popular. Pronto lo lansa tambe hopi mas proyekto.



KOMUNIKADO PA PRENSA

Fecha

17 di yüni 2016

Accountmanager

Jhanirha Da Costa Gomez-Anita

Email

jhanirha.anita@gobiernu.cw

[FINAL DI KOMUNIKADO]

Nota pa redakshon – No pa publikashon

Bosero: Clifton Wallé

Kontakto via di Domeinbeheer

Vinanshely Bonovasia

462-5176